

Meeqqat inuusuttullu sumiginnagaasut ikilisinniarlugit nuna tamakkerlugu iliuusissatut pilersaarummik kingusinnerpaamik UKA2019-mi saqqummiunneqartussamik Naalakkersuisut suliaqarnissaat pillugu Inatsisartuni aalajangiiffigisassatut siunnersuut.

(Inuit Ataqtigiit ilaasortaataat)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Aappassaaneerneqarnera

Ilaqtariinnermut Peqqissutsimullu Ataatsimiititaliap siunnersuummik peqqissaartumik suliaqarsimaneranut Naalakkersuisut qutsavigiumavaat.

Meeqqat Pisinnaatitaaffii pillugit Naalagaaffiit Peqatigiit isumaqatigiissutaata Kalaallit Nunaanit akuersissutigineqarnerata ukiut 25-inngorneranni MIO-p nalliuttorsioritsineranut ippassaq peqataavunga. Tassunga atatillugu MIO-p nalunaarusiaanik nutaamik tunisippunga, tassani Meeqqat Pisinnaatitaaffii pillugit Naalagaaffiit Peqatigiit isumaqatigiissutaanut Kalaallit Nunaata naammassinninniarnernitut unammilligassai ataatsimut isigalugit takuneqarsinnaasunnngortinneqarput. 2015-imiit illoqarfinni nunaqarfinnilu MIO-p angalasarsimanerannit unammilligassanut ataatsimut isiginninneq pilersinneqarpoq.

Meeqqat Pisinnaatitaaffii pillugit isumaqatigiissutip artikiliini 54-iusuni katillugit 19-it Kalaallit Nunaata naammassinngikkai nalunaarusiami inerniliussaavoq.

Meeqqat Pisinnaatitaaffii pillugit isumaqatigiissutip ullormiit ullormut – imaluunniit ukiumiit ukiumut malinneqalernissaa piviusorsuunngilaq. Tamanna uagutsinni piviusuuvoq, aammali nunani allani isumaqatigiissumik akuersisimasuni tamanna atuuppoq. Meeqqat pisinnaatitaaffiisa sulissutigineqarnerat taamaattumik ataavartumik suliassaavoq. Tamanna pillugu tamatigut – aamma siumut isigaluta – meeqqat atugaasa pisinnaatitaaffiisalu pitsanngorsartuarneqarnissaat ukkatariuassavarput. Taamaattoq, isumaqatigiissutip akuersissutigineqarneranit ukiut 25-it qaangiunneranni isumaqatigiissummik naammassinninniaanerp sulii taama annikitsigineranik Naalakkersuisut naammagisimaarinninngillat – aamma meeqqat taama amerlatigisut sulii sumiginnarneqartarmata inooqataaffigisinnaanngilluinnarparput.

Meeqqanut- inuusuttunullu suliassaqarfinni Namminersorlutik Oqartussat kommunillu pitsannguutissanik sulii annertuunik suliassaqarput. Tamanna pillugu suliassaqarfinni kommunit suliniutaat aamma Naalakkersuisut nuna tamakkerlugu suliniutaat eqqarsaatigalugit pitsanngorsaasoqassaaq.

Massakkut meeqqanut- inuusuttunullu suliassaqarfinni suliassat amerlanerusut kommuninut tunniunneqarnissaat piffissaanngimmat, Naalakkersuisut taamaammat aamma erseqqissaatigissavaat. Ingammik uani eqqarsaatigalugu ulloq unnuarlu paaqqinniffinnut suliassaqarfik, massakkut kommunit akisussaaffigeriigaat malunnaatilimmik aaqiivigineqarpata taanna aatsaat kommuninut tunniunneqarsinnaassaaq.

Suliassaqarfimmi piffissaq ungasinnerusoq isigalugu politikikkut pilersaarusiornissarput pisariaqartoq MIO-p nalunaarusiaata nutaap erseqqissarpaa. Nuna tamakkerlugu sumiginnaaneq pillugu iliuusissatut pilersaarusiortoqarnissaanut siunnersuutip massuma siamasissumik politikikkut isumaqataaffigineqarnera taamaammat nuannaarutigaa. Tamanna Naalackersuisunit malitseqartinneqassaaq. Matumani siusissukku aamma pitsaaliuilluni suliniutit, kiisalu suleqataasut akornanni ataqatigiissaarineq ukkatarineqassapput.

Naalackersuisut taama oqaaseqarlutik siunnersuutip akuersissutigineqarnissaa innersuussutigaa.